



## KHUTBAH JUM'AT

TAJUK : "BERAZAM KE ARAH KEMALIHATAN"

TARIKH: 01 JANUARI 2021 / 17 JUMAD AL-ULA 1442

اَلْحَمْدُ لِلّٰهِ اَلْقَائِلِ :

يَا أَيُّهَا الَّذِينَ ءَامَنُوا اتَّقُوا اللَّهَ وَلْتَنْظُرْ نَفْسٌ مَّا قَدَّمَتْ لِغَدٍ وَاتَّقُوا اللَّهَ إِنَّ اللَّهَ

خَبِيرٌ بِمَا تَعْمَلُونَ ﴿١٨﴾

(Surah al-Hashr: ayat 18)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.  
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ، وَمَنْ تَبِعَهُمْ بِإِحْسَانٍ  
إِلَى يَوْمِ الدِّينِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ، وَلَا تَمُوتُنَّ إِلَّا وَأَنْتُمْ مُسْلِمُونَ.

**SIDANG JUM'AT YANG DIRAHMATI ALLAH ﷻ,**

Bertaqwalah kepada Allah ﷻ dengan melaksanakan segala perintah-Nya dan menjauhi segala tegahan-Nya. Bersamalah kita menjaga diri, keluarga dan masyarakat daripada segala perkara yang membawa musibah. Mimbar pada hari ini akan membicarakan khutbah yang bertajuk "BERAZAM KE ARAH KEMALIHATAN".

## **SIDANG JUM'AT YANG DIMULIAKAN,**

Tahun 2020 telah meninggalkan kita dengan pelbagai kisah suka duka, pahit manis yang terlakar di dalam diari kehidupan kita pada tahun lalu. Pelbagai cabaran dan ujian terpaksa ditempuhi antaranya krisis pandemik COVID-19 sedikit sebanyak telah menjejaskan azam dan cita-cita yang diimpikan pada tahun 2020. Krisis ini bukan sahaja menguji ketabahan malah mengubah corak kehidupan seharian kita dengan norma baharu.

Namun, di sebalik ujian yang melanda kita seharusnya bersyukur dan sentiasa positif memandang ke hadapan kerana setiap apa yang berlaku pasti tersirat seribu satu hikmah daripada Yang Maha Esa. Allah ﷻ berfirman dalam surah al-Mulk ayat 2:

الَّذِي خَلَقَ الْمَوْتَ وَالْحَيَاةَ لِيَبْلُوَكُمْ أَيُّكُمْ أَحْسَنُ عَمَلًا وَهُوَ الْعَزِيزُ الْغَفُورُ ﴿٢﴾

**Maksudnya:** Allah telah mentakdirkan adanya kematian dan kehidupan untuk menguji kamu, siapakah antara kamu yang lebih baik amalannya? Dialah Maha Kuasa (membalas amal kamu), lagi Maha Pengampun, (bagi orang yang bertaubat).

## **SIDANG JUM'AT YANG BERBAHAGIA,**

Menjadi kelaziman setiap kali berganti tahun, masyarakat kita akan memasang atau memperbaharui azam, malahan ada yang menjadikannya sebagai kewajipan untuk menetapkan satu matlamat baharu dalam kehidupan. Pelbagai azam disematkan dalam jiwa. Antara azam tersebut mungkin ada yang ingin menurunkan berat badan, mendirikan rumah tangga, mendapat keputusan cemerlang, mencari

pekerjaan baharu, dan menjadi pekerja berdedikasi sebagai sasaran untuk berusaha lebih kuat dan gigih bagi mencapainya.

Sebagai seorang Muslim, seharusnya penetapan sesuatu azam perlu diberikan penekanan dalam soal ibadat dan akhlak. Antaranya seperti memperbaiki solat, bersolat jemaah di masjid, memperbanyakkan puasa sunat, bersedekah, khatam al-Quran, menyempurnakan nafkah, menjadi Muslim yang baik, mendidik keluarga, meninggalkan perkara maksiat dan mengurangkan bercakap perkara sia-sia. Allah ﷻ berfirman dalam surah Ali-Imran ayat 159:

فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ ﴿١٥٩﴾

**Maksudnya:** Apabila kamu telah berazam (untuk membuat sesuatu) maka bertawakallah kepada Allah. Sesungguhnya Allah Mengasihi orang yang bertawakal kepada-Nya.

### **SIDANG JUM'AT YANG DIRAHMATI ALLAH ﷻ,**

Sebagai umat Islam, perkara yang diazamkan semestinya meliputi perkara kebajikan dan tidak bertentangan dengan ajaran agama. Hal ini termasuklah berazam melakukan kebaikan dan mempertingkatkan untuk kemajuan individu atau kelompok masyarakat dalam aspek pengurusan ekonomi, sosial, pendidikan, kesihatan dan kebajikan.

Niat yang disertai dengan azam yang ikhlas dan tujuan yang baik tetap akan diberikan ganjaran walaupun seseorang itu tidak sempat merealisasikannya.

Rasulullah ﷺ bersabda:

إِنَّ اللَّهَ كَتَبَ الْحَسَنَاتِ وَالسَّيِّئَاتِ، ثُمَّ بَيَّنَ ذَلِكَ: فَمَنْ هَمَّ بِحَسَنَةٍ فَلَمْ يَعْمَلْهَا كَتَبَهَا اللَّهُ عِنْدَهُ حَسَنَةً كَامِلَةً، وَإِنْ هَمَّ بِهَا فَعَمِلَهَا كَتَبَهَا اللَّهُ عِنْدَهُ عَشْرَ حَسَنَاتٍ إِلَى سَبْعِمِائَةٍ ضِعْفٍ إِلَى أَضْعَافٍ كَثِيرَةٍ، وَإِنْ هَمَّ بِسَيِّئَةٍ فَلَمْ يَعْمَلْهَا كَتَبَهَا اللَّهُ عِنْدَهُ حَسَنَةً كَامِلَةً، وَإِنْ هَمَّ بِهَا فَعَمِلَهَا كَتَبَهَا اللَّهُ سَيِّئَةً وَاحِدَةً.

**Maksudnya:** Sesungguhnya Allah menulis kebaikan dan kesalahan kemudian menjelaskannya. Sesiapa yang berniat dan berazam melakukan kebaikan namun dia tidak (jadi) melakukannya, Allah tetap menuliskannya sebagai satu kebaikan sempurna di sisi-Nya. Jika ia berniat dan berazam berbuat kebaikan kemudian mengerjakannya, maka Allah memberikan ganjaran sebanyak sepuluh kebaikan sehingga tujuh ratus kali ganda bahkan lebih banyak daripada itu. Sesiapa yang berniat berbuat buruk namun dia tidak jadi melakukannya, maka Allah menulis di sisi-Nya sebagai satu kebaikan yang sempurna. Sesiapa yang berniat berbuat keburukan kemudian mengerjakannya, maka Allah menuliskannya sebagai satu kesalahan. (Riwayat Bukhari dan Muslim)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ  
الْمُسْتَغْفِرِينَ وَيَا نَجَاةَ التَّائِبِينَ .